







Digitized by the Internet Archive  
in 2018 with funding from  
Getty Research Institute

<https://archive.org/details/henriciboomorati00boom>

HENRICI BOOM  
ORATIO,

D E

ORIGINE ET FINE  
POËSEOS DRAMATICÆ.

*HABITA IN CHORO TEMPLI NOVI,*

Prid. Non. APRILIS, MDCCXXXVIII.



AMSTELÆDAMI,

Apud JOANNEM BOOM. 1738.

JOHN B. BROWN  
OF THE  
FEDERAL BUREAU OF INVESTIGATION

U. S.

DEPARTMENT OF JUSTICE

WASHINGTON, D. C.

RECEIVED

NOV 10 1936

AMSTERDAM

JOHN B. BROWN



# ORATIO,

DE

## ORIGINE ET FINE POËSEOS DRAMATICÆ.



On ea est, A. P. Scientiarum, quibus juvenus ad humanitatem conformari solet, indoles, ut in iis versantibus nunquam liceat feriis miscere nugas; quoniam, ut nescio quis recte dixit, & labor mutatus haud raro quietis vicem præbuerit, & cuncta, quæ pro nugis habeantur a quibusdam, propterea re ipsa, si probe consideres, nugæ non sint. Quæ ab humanitate nomen nactæ sunt scientiæ, veluti quodam vinculo aliæ aliis adhærent, nec cuiquam, perito maxime laudatarum, licet plane esse imperito aliarum, quæ, licet minus laudatæ, versantur tamen in rebus haud valde diversis.

Et me quidem, ut in dicendi initio de me pauca dicam, haud raro juvit ad amœna studiorum vireta divertere, quietisque loco tractare levioris

quidem momenti scientias, verumtamen minime vituperandas. Quam autem nunc paulo diligentius persequar materiam, ea vobis omnibus ostendet, puto, me quidem, quod dixi, subinde delectari nugis, verum nugis ejusmodi, quæ ducunt in seria. Dicturus enim sum de Origine & Fine Poëseos Dramaticæ; quod me facientem qui audiverint animis benevolentibus & linguis faventibus, oratione finita certius judicabunt, an operæ pretium fecerim, quam si meum nihil tale merentis sermonem non auditum, veluti præjudicatâ opinione, condemnent. Quid enim? si Poësis omnis, inter humani ingenii conatus eximios jam antiquissimis temporibus & habita & numerata, omnino damanda sit, non dubium est, quin una condemnetur Dramatica; sin autem, una cum eâ hæc locum tueatur suum necesse est.

Vetustissimis gentibus hymnos decantare in honorem Bacchi, Apollinis, Cereris, Dianæ, & aliorum Deorum Dearumve, morem fuisse inter omnes constat, præsertim multis ejusdem pagi incolis simul sacra facientibus, & pro acceptis beneficiis gratias Diis agentibus. Nec sacra ista ab tristibus hominibus peracta fuisse, æque constat. Hinc hilaritas, hinc joci, hinc convivium in sacris. Neque Dramaticæ poëseos alia est origo. Præter hymnos enim, festivitate rusticos ad hilaritatem invitante, legimus

car-

carmina varii generis in conventibus istis decantata fuisse, interdum non valde sacris convenientia quidem, sed qualia ab ebria turba eructari solent, & tamen carmina.

Ab istis initiis, A. O. crevit Poësis Dramatica, ut rerum præstantium origines sæpe debentur casui fortuito. Quod unus cantabat initio, postea plures cantaverunt, aut simul, aut vicissim; aliis respondentibus, cum alii cantu præiissent. Inde Chori, inde Personarum in Dramatis origo. Cum vero homines ingenio præstanti, quibusque virtutis & morum studium cordi esset, intelligerent inconditos istos cantus, carmina ista lasciva, ad communem omnium utilitatem artificiose converti posse, in eo cœperunt exercere industriam suam, & quod sibi proposuerant, labore non levi nec parvo tempore, obtinuerunt.

Primus sane, aut inter primos, qui personarum colloquia ficta carmine instituit, dicitur fuisse Theſpis quidam Icarientis Atticus, Soloni, Legislatori prudentissimo, ætate par, & pene æqualis. Et ille quidem tragœdias reperisse fertur; ut veteris comœdiæ pater Eupolis dicitur.

Nec tamen, ut quod sentiam aperte dicam, omnis Dramatis origo videtur mihi a sacris arcessenda, quum a veritate non videatur abhorrere, Poëtarum aliorum, præsertim epicorum, studio rem



Dramaticam admodum adjutam atque illustratam esse, sine ulla sacrorum occasione aut solennitate.

Homerum, Poëtarum apud Græcos patrem, e cujus scriptis, tanquam ex perenni fonte, vates multi sua hauserunt, omnes norunt, qui plane Musas non ignorant. Apud illum Jovis, Junonis, Agamemnonis, Nestoris, & quorum non deorum heroumve? orationes elegantissimæ occurrunt. Ex illis & Homerus ipse dum vixit, & post eum Rhapsodi, in conventibus recitabant, quas cuique esset libitum orationes: quæ res adeo Græcis placuisse videtur, ut apud quosdam vel legibus fuerit cautum, ut in festis publicis ex laudatissimis patris Poëtarum operibus particula, quæ maxime adlubesceret civibus, recitaretur. Illos Rhapsodos, carmina decantantes aliorum, primus in theatrum produxit Demetrius, cui Phalereo cognomen fuit. Recitabant isti, virgam lauream manu tenentes, sedata voce, & ad rem composita, carmina ad fortitudinem, temperantiam, fidem, aliasque virtutes innumeras, auditores excitantia: nec Homeri carmina tantum decantata fuisse in theatri legimus, sed etiam Hesiodi, Archilochi, Mimnermi, Phocylidis, aliorumve, quorum scriptis præcepta vitæ idonea contineri, & veteres putaverunt, & hodie omnis eruditorum chorus ultro agnoscit.

Tum



Tum vero ingens augmentum cœpit Poësis Dramatica singulari industria & labore Æschyli, quem vel ideo veteres videntur Tragoediæ primum auctorem statuisse, quod primus theatro apta conscripserit, quum ante se theatris tantum nihil pene scriptum fuerit. Cujus viri laudes quid prædicem? Septem ab eo conscriptæ tragoediæ supersunt, æterna nominis illustrissimi monumenta. Nihil ibi lascivum; nulla præcepta, nisi ad severæ virtutis normam exacta; nihil quod Deorum reverentiam tangat aut lædat. Quid memorabo Sophoclem, quid Euripidem, quid alios, quorum nomina adhuc summo in honore sunt apud eruditos? Illis heroi-  
corum temporum res benignam ad Dramata materiam præbuerunt, plane ut Poëtæ epici inde plerumque sibi carminum materiam aut sumpsere aut finxere.

Non video, quid eo usque in Tragoediis sit culpandum, nisi forte quod non raro furoris & immanitatis in iis supersint exempla horrenda. Verum, quid aliud Poëtæ, exhibituri Thebanorum aut Argivorum res vetustissimas, in scenam producere potuerunt, quum istorum populorum rebus gestis, nimia crudelitate infamibus, eorum cives maxime delectarentur.

Quam vellem, A. P. ut & comicorum Fabulæ, ut Mimi, aliive ludi Scenici, eodem jure possent de-

defendi! Quod si plures Græcorum comœdias a temporum iniquitate integras servasset superiorum seculorum diligentia, non dubito, quin etiam earum utilitas summa agnosceretur, & quantum profuerint ad vitam formandam, moresque erudiendos constaret inter omnes. Scilicet Græci, cum viderent in Tragœdiis regum vitia, & sortem haud undique felicem, libenter a populo spectari, cœperunt eorum Poëtæ etiam privata civium suorum vitia & mores malos in scenam producere, ut & spectatores discerent, fœda inceptu etiam fœda exitu esse, atque vitanda; & cives potentiores intelligerent, si quid peccarent, non defuturos, qui illorum peccata in lucem publicam protraherent; quod Epicharmus Siculus primus fecisse legitur. Verum, ut nihil, quantumvis bonum, est, quin mutando possit depravari, ita comici, ut auram popularem captarent, verba prætextata & turpia admiscere cœperunt, dolentibus omnibus bonis, ipsisque adeo Musis.

Aristophanis comœdiæ supersunt undecim, quæ propter Atticum dicendi genus ab eruditis diliguntur, bonis æque omnes non placent, propter scurrilitatem & sermonem adeo dissolutum, ut e medio scelestæ plebis sermone dictionem sumpsisse, atque in scenam transtulisse nonnunquam videatur. Eupolis atque Cratinus ante Aristophanem jam fabulas

bulas dederant discendas, nunc vero perditas; nec earum jacturam quod bonus quisquam doleat, causam ullam subesse puto, quum comœdiæ, quam vocant, veteris scriptores, Aristophani non dissimiles, ad argumentum si spectes, fuisse videantur: & ipse Eupolis nimiam in dicendo libertatem morte luerit.

Prudentius egerunt secuti apud Græcos novæ comœdiæ auctores, inter quos Menander omnium judicio summam laudem meruit; quod fictis luserint fabulis, & omnes ingenii atque artis nervos intenderint ad spectatores emendandos, in exemplum criminibus pœnas, virtutibus præmia tribuentes.

Perierunt pleræque, A. O. perierunt malo fato Menandri fabulæ lepidissimæ, quas quanti fecerit Quintilianus, summus dicendi magister, vel ex testimonio, quod in illius Institutionibus invenitur, satis superque patet; quum vel unum illum dicat omnem vitæ imaginem expressisse, tantamque in eo inveniendi copiam & eloquendi facultatem fuisse, ut vel unus sufficiat ad eloquentiam omnibus numeris perfectam adspiranti.

A Græcis ad Romanos si mea sese conferat oratio, præsertim ad Terentium, unicum scenæ apud eos decus, & qui adhuc in scholis tanquam exemplar sermonis castigati juventuti imitandus proponitur, a cujus fabulis mores mali exulant, magis elucebit, quantus fuerit Menander, quod ipse ille



Cæsar, qui quo animo bella gessit, eodem etiam scripsit, honorifico carmine Terentium suum fuerit profecutus, eumque ibi dimidiatum Menandrum vocaverit.

Quid plura? apud cunctas gentes viri rerum humanarum periti exstiterunt, qui, tanquam in speculum in vitam alienam ut sui cives inspicerent, in scena exhibuerunt vitæ civilis imaginem; & bello indicto vitiis, superbix, avaritiæ, malæ fidei, adolescentum actionibus temerariis, istum sibi finem proposuerunt, quo istorum vitiorum turpitudinem publice ridendam propinantes in theatris, animos male affectos sanarent, & errantes comiter in viam revocarent. Nec philosophiam qui ad vitam civilem revocarunt, aut carminibus heroicis præcepta vitæ utilia suis dederunt civibus, alium sibi finem proposuerunt ac scriptores fabularum; quem tamen si neglexerint quidam, ii non amplius in numero bonorum civium sunt habendi, sed tanquam pestes Reipublicæ vitandi.

Abhorrent probi omnes, abhorrent, inquam, maxime theatralium ludorum lascivam licentiam animos adolescentum corrumpentem, & ipsam virtutem graviter vulnerantem. Recte turpes Mimi separandi sunt a Dramatis non minus honeste actis quam prudenter scriptis. Et sane Tertullianus, Minutius Felix, Clemens Alexandrinus, & non pauci e veteribus Ecclesiæ Doctoribus, cum ludos thea-

theatrales damnaverunt, suorum temporum Dramata impia, crudelia, turpia, infamia vituperasse censendi sunt. Idque ne temere dixisse videar, finite me quædam eo facientia proferre.

Quos dixi Patres, Dramata quævis non abhoruisse, ex eo palam fit, quod ipsi libenter genus scribendi per colloquia adhibuerunt, ut nemo literas doctus ignorat. Et Dramata bonos mores tuentia quid a colloquiis bonis differant, vix video. Immo in quorundam scriptis vix pagellam legas, ubi Sophocles, Euripides, Æschylus, Menander, alique, his non dissimiles tragici aut comici, Poætæ non ad partes vocentur. Et Clemente quidem Alexandrino, qui summo jure gentilium impura Dramata nusquam non detestatur, eximiorum, quos dixi, Poëtarum testimoniis, nemo libentius utitur. Quid? nisi temporis ratio angustis orationem hanc meam terminis circumscriberet, Nazianzenum, Apollinarium utrumque, patrem scilicet & filium, comædias, fabulis Menandri haud dissimiles, docuisse, evincerem.

Nec, post disciplinas barbarie expulsa restitutas, summi inter reformatos Theologi defuerunt, qui, veteres Theologos secuti, & censuerunt non quævis Dramata esse damnanda, & qui ipsi fabulas composuerunt. Bezæ, at quanti viri! tragœdia, cui Abrahamus Sacrificans nomen est, vernacula ipsi lingua, Gallica scilicet, conscripta est, quo tem-

pore ille Lausannæ publice literas profitebatur. Conscriptam dico? cunctis placuisse, sapius prælo descriptam, & ab aliis Latine versam, non ignorant qui ipsa Minerva favente conscripta Beza poemata norunt. Daniele Heinsum, Hugonem Grotium, & magno numero alios, tam vernaculæ quam Latina Poëseos decora illustria, quorum etiam quosdam celeberrima hæc urbs fovit & amanter complexa est, tacitus prætereo, ne videar studio nimis acriter urfisse, quod nec hujus loci est, nec hujus personæ.

Non possum tamen a me impetrare, quin addam Lutherum, Calvinum, Melancthonem, Bucerum, & alios magno numero Theologos, censuisse, Dramata, si ad mores emendandos, & vitæ civilis nævos corrigendos conscripta sint, nec quidquam contra sit adjunctum, utiliter tolerari, & spectari in Republica. Et Calvinus quidem (ne quis arguat me sine certo testimonio adfinxisse viro summo sententiam, quæ ejus non fuit) quid egerit, cum Genevæ calidior quidam Theologus imprudenter pro concione in actores scenicos esset invectus, docebit legentes epistola ad Farellum, egregium itidem virum, ab ipso data, quæ typis descripta prostat inter ejus epistolas. Rem vero mihi videtur confecisse celeberrimus suo merito Andreas Rivetus, qui Theologiam in Academia Lugduno-Batava seculo superiore summa cum laude professus est, cum in commentariis ad Decalogum observavit, ad tria  
ca-



capita posse revocari quidquid contra spectacula adfertur. Scilicet quod scelerum exempla in ipsis Diis gentilium non raro proponantur; quod illa partem cultus idolorum constituerint; & quod vel crudelia essent vel obscœna.

Vera sunt sine dubio, quæ dicit vir magnus; nec aliud Tertullianus aut Cyprianus, & quotquot alii in ludos theatrales investiti sint, quod culparent habuerunt. Nec aliter sentient, quotquot virtutis studium quacunque ratione promovendum esse putant; quotquot in vitam humanam, tanquam in speculum, inspiciendum suadent; & quotquot noverunt in scena utiliter ista vitia, quibus Reipublicæ ratio pœnas statuere non potest, traduci, ut spectatores ab iis avocentur. Homo aut sordide avarus, aut ingratus erga se beneficiis afficientes, aut senex amore intempestivo tenerâ ætate puellam ambiens, si in scena spectentur, rident Spectatores humanarum susceptionum stultitiam: & dum rident, ad se referre discunt quod propositum est, ut deinceps caveant, ne eadem illos vitia contaminent, quæ summo jure turpia & probrosa haberi spectaverunt.

Atque hæc quidem sunt A. P. quæ pro temporis ratione de Poësi Dramatica, ejusque fine, dicenda habui. Originem audivistis, deductam a cultu Deorum, & a Rhapsodis, publice partem aliquam heroici carminis decantantibus, quorum vestigiis alii insistentes Tragœdias, & Comœdias procuderunt,

eo fine ut aut historias, suæ quisque gentis, magnifice enarrarent, aut ut jucunda & idonea vitæ dicerent. Mimi vero, varii generis, & e Comædis non pauci, ad risum infimæ plebis scurrilibus dictis captandum, non dubitaverunt e re, per se non mala, pessimam & nocentissimam facere; eâque ratione illi meruerunt odium bonorum omnium, qui ad unum omnes optant, ut spectacula, quæ mores juvenum, non dico corrumpere, sed vel inficere; quodammodo soleant, prohibeantur, tollantur, & radicitus extirpentur. Utilibus autem in publicum spectaculis, juventuti interdicare, quæ invidia est? anne ut rerum humanarum ignari postea suo periculo discant cavere, quæ ibi per lulum & jocum cavere docentur? non puto: nec putabit quisquam, qui audiverit, quo fine Dramata sint reperta; quid & Patres, quos vocant, censuerint; quid Theologi summi, postquam suus veritati splendor assertus fuit, præ se tulerint; quidque summa eruditione homines post literas renatas fecerint.

Hominum sane prudentum est, ut apes floriferæ omnia in saltibus libant, e dictis ac factis aureis, quæ in Dramatis exhibentur, itidem decerpere, quæ in utilitatem vitæ redundabunt; profana vero, aut quacunque ratione noxia, aut latens aliquod venenum habentia, longe longeque a se arcere, & quantum potest abominari.

# GRATIARUM ACTIO.

**Q**UOD MÎ, *Scholarum nomine, gratias*  
*Vobis licet nunc dicere, CONSULES,*  
*Gratum est, satis digne quàm si*  
*Pro meritis celebrare laudes.*

*Vos, quæ benigno Numine percita*  
*Terrena spernens scandit in æthera,*  
*Præstans juvenus dicit alta*  
*Voce Scholæ Patriæque Patres.*

*Vestros honores prædicat Amstela;*  
*Nec sola: plaudens cum sonet undique,*  
*Virtutibus commota tantis*  
*Patria nobilium virorum.*

*Musis favetis. Sic quoque literas*  
*Virtutis altæ participes facit*  
*Idem favor, qui multa præbet*  
*Præmia, Pierisq; benignus.*

*Grati parentes, quod juvenum Chorus*  
*Agnoscit omnis, pectore prædicant*  
*Læto, vorantes ut per annos*  
*Resque Scholæ Patriæque crescat.*



**VIR MAGNE,** *summi qui abdita Numinis*  
*Arcana pandis, nos Tibi maximas*  
*Nunc dicimus grates, parati*  
*Pro meritis quoque habere semper.*

*In moribus ne deficiat vides,*  
*Musas juvenus quæ colit acriter;*  
*Neu lapsa turpi vita culpa*  
*Dedecoret studia atque mores.*

*Vivas*



*Vivas, precamur, laudibus & Tuis  
Accedat ingens nomen ab Artibus;  
Ut grata post annos juventus  
Læta velit celebrare laudes.*



*RECTOR juventæ, cen pater optimus,  
Nobis viam qui gnaviter indicas  
Ad templa Musarum serena,  
Mens bona quæ colere una gaudet;*

*Et gratias nos dicere nunc Tibi  
Magnas juvaret: verum animus licet  
Id suadeat gratus, Tuas nos  
Ipse jubes reticere laudes.*



*DOCTI VIRI, quæis cura Scholastica  
Commisssa gaudet, solvere quæis decet  
Grates perennes, Vos meretis  
Perpetuas sine fine laudes.*

*Præcepta linguæ nos toties data  
Cogunt honores tellere laudibus  
Vestros; per ævum non abibunt  
Ex animis benefacta nostris.*



*DILECTUS a me, ô Juvenes, Chorus,  
Musis amænos qui colitis dies,  
Jam vos relinquo. Vos valetè, &  
Discite, dum snit hora pernix.*





Des Waerelds dwaasheid, als die komt van hooger hand, Waardeerd men boven goud en burgers groot verstand











